

“Mehdajsiuq” Sanhgyangh Yangz Denz: Swnjcienz Siuqdung Dwg Aen Siengjmuengh Ceiq Hung

三江“绣娘”杨甜：传承侗绣是最大的梦想

□ Hou Sinhyen Ciz Denhbauj raiz Dahdingz hoiz

Youq gwnz Aen Canjlanj Cozbinj Meijsuz Gunghyi (Gij Gunghyibinj Lijyouz) Caeuq Cinghbinj Lauxhangz Guengjsae Bi 2017, Yangz Denz boux daenj buhvaq minzczu conzdungj youq yienhciengz daet ceij neix daegbied hawj vunz haeujsim, haujlai vunz daeuj ngonzyawj canjlanj haenx cungj daengx din roengzdaeuj ngonzyawj. Yangz Denz bineix ndaej 55 bi, dwg vunz Dungzloz Yangh Sanhgyangh Dungcu Swciyen Liujcouh Si, baez neix dwg daiq gij siuq Dungcu Sanhgyangh Liujcouh miz daegsaek minzczu haenx daeuj camgya canjlanj. Yangz Denz daj 7 bi haindu hag Siuqdung, youq ca mbouj geijlai 50 bi seizgan ndawde, de itcig genhciz soujmaenh youq gwnz diuzroen swnjcienz SiuqDung, seizneix, de yungh gij hengzdoengh bonjfaenh bae son'gyauq “mehdajsiuq”, neix hix dwg aen siengjmuengh ceiq hung de.

Mwh iq couh maij Siuqdung

“Gou daj iq couh maij Siuqdung, lauxsae youq gwnz gyangjdaiz hwnjdangz, gou couh youq baihlaj daet ceij,dajsiuq.” Dwen daengz Siuqdung, Yangz Denz naeuz dwg deng vunz ndaw ranz yingjiyangj, ndigah daj iq couh yinx Siuqdung. Mwh ndaej 6 bi, daxmeh,dahcej Yangz Denz dajsiuq, de ciengzseiz youq henz yawj, seiz daxmeh okrog guhhong, de engqlj laeglemx daek aeu gij raemx ndaw aendoengj nyumx baengz daxmeh haenx, caemhcai yungh gaiq baengz iq ndeu daeuj sawq lumj daxmeh nei bae nyumx, byawz rox gingqyienz baenz lo, neix hawj de sim'angq dangqmaz.

Daj haenx gvaqlaeng, daxmeh caeuq dahcej couh bienqbaenz boux lauxsae buqmoengz Yangz Denz hag Siuqdung lo, haq hawj vunz le, lauxyah couh bienqbaenz boux sonyinx Yangz Denz laebdaeb hag Siuqdung. “Gou hix ciengzseiz cam bonjfaenh, vih maz couh baenzneix maij Siuqdung, vih maz couh byaij hwnj diuz roen neix ne?” Yangz Denz naeuz, gij maij de doiq Siuqdung haenx gig swhyienz, caemhcai itcig genhciz guh faenh dinfwnz neix haujlai bi, dandan dwg aenvih bonjfaenh doiq Siuqdung miz yinx, caen mbouj miz maz gzyawz leixyouz. Yangz Denz dwg vunz bonjdeih Dungzloz Yangh Sanhgyangh, de daj Dungzloz Yangh Sanhgyangh okseng, hix haq youq Dungzloz Yangh Sanhgyangh. Lauxyah de dwg bouxswnjcienz Siuqdung faenh dinfwnz neix, neix hawj gij yienzfaenh Yangz Denz caeuq Siuqdung engqgya laeg lo, de bienqbaenz bouxswnjcienz daihsei daih Siuqdung Sanhgyangh Liujcouh.



▲Yangz Denz cingq dajsiuq.

Gij genhciz doiq Siuqdung haenx caengz vut bae gvaq

“Gij dozanq Siuqdung aeu duzlungz, duzfungh, va, duzroeg, gorum,daengngoengz daengj swnghvuz, gingjvuz swhyienz guhcawj, gij saek baengzsiuq cix dwg youz bonjfaenh gag dap. Siuqdung cungj dwg siuqsaek, caeuq gij siuq gzyawz miz cabied. Guh Siuqdung bouh daih' it dwg aeu ra ndei baengz dajdaej, bouh daihngaih dwg daet ceij, caemhcai aeu gij ceij daet ndei haenx nem youq gwnz baengzdaeuj, bouh daihsam couhdwg dajsiuq, yienghneix couh guh baenz lo.” Genhciz guh Siuqdung faenh dinfwnz neix haujlai bi, gangj daengz baenzlawz dajsiuq, Yangz Denz hix dwg menhmenh gangj okdaeuj, sug dwk lumj gvaq ndwenngoengz nei. De baez gangj couh haindu guhyienh hwnjdaej, yienzlaiz guh Siuqdung wnggai aeu ceijdaet cuengq youq gwnz baengzdaeuj, yienghneix guh dwg vih hawj gij doxgaiq siuq yawj hwnjdaej engq lumj daengj youq nei, danghnaeuz baengzdaeuj gaeng yungh ceijdaet bau ndei lo, couhcinj deng raemx dumz hix mbouj yungh lau ceijdaet deng buqvaih, neix dwg gij gi'gyauj iq guh Siuqdung. Hoeng, guh Siuqdung mboujdan aeu miz gi'gyauj, lij aeu miz naihsim. “Seizneix haujlai bouxcoz giepnioix naihsim. Ndigah danghnaeuz miz vunz dwg gag siengj hag Siuqdung, gou gig haengj son de, aenvih dajsiuq ceiq youqgaenj dwg aeu miz naihsim, miz naihsim cij hag ndaej roengzbae, hag ndaej ndei.” Yangz Denz naeuz, guh Siuqdung aeu yungh bae haujlai seizgan, lumjbaenz guh doiq soij Siuqdung ndeu couh aeu yungh bae ngoenz seizgan ndeu,

engqlj lengqseiz ngoenz ndeu cij guh ndaej aen ndeu, ndigah yaek siengj guh ndei faenh dinfwnz neix, aeu miz naihsim doh couh ndaej.

Siuqdung dwg feihvuzciz vwnzva yizcanj Guengjsae Bouxcuengh Swcigih, de dwg cungj gunghyi conzdungj comz dajdaemj, dajnyumx, daet ceij, dajsiuq youq aen cingjdaej ndeu, Yangz Denz maqmuengh, ndaej miz engq lai bouxcoz gyahaeuj aen doih swnjcienz faenh dinfwnz neix daeuj. “Gou yaek ndaej 60 bi lo, bi geq gvaq bi, ndawsim couh yied daeuj yied you, gou gig lau Siuqdung faenh dinfwnz neix yaek saetcienz, ndigah seizneix ceiq youqgaenj dwg itdingh aeu son'gyauq ndei bouxcoz, hawj bouxcoz aeu de swnjcienz roengzbae.” Aenvih Siuqdung dwg gij hong gwnz fwngz, aengngoengz aiq yaek cungj dwg naengh youq, ciengzgeiz doxdaej, ndokgyaemj Yangz Denz couh miz vwndiz lo. De naeuz, riengz bi'ndwen gyalai, ndangdaej engq dwg beij mbouj ndaej gaxgonq, song bi gonq de lij bae yihyenz guh gvaq liuhleix yw ndokgyaemj, dahlwg raen gij yiengh hojsouh de le hix gienq de vut Siuqdung gvaq, hoeng Yangz Denz ndawsim gag naeuz mboujguenj baenzlawz hoj, hix aeu Siuqdung genhciz guh roengzbae, cienz roengzbae.

Maqmuengh ndaej son'gyauq ok engq lai “mehdajsiuq”

Aen Canjlanj Cozbinj Meijsuz Gunghyi (Gij Gunghyibinj Lijyouz) Caeuq Cinghbinj Lauxhangz Guengjsae neix, Yangz Denz cujyau dwg daiq buhhaq caeuq gij yisuzbinj aennda Siuqdung daeuj camgya canjlanj, de lij daiq gaiq dauqcenj, lienhngaenz, goenhfwngz, soij daengj gij gungh-

yibinj lijyouz daeuj doigvangq gai. “Ndae camgya Aen Canjlanj Cozbinj Meijsuz Gunghyi (Gij Gunghyibinj Lijyouz) Caeuq Cinghbinj Lauxhangz Guengjsae neix, gij siengjap ceiq hung gou dwg aeu Siuqdung Sanhgyangh senhconz okbae, swnjcienz roengzbae, doigvangq minzczu vwnzva Dungcu, hawj engq lai vunz rox, engq ndei aeu Siuqdung swnjcienz roengzbae.”

Seizneix, ndaw ranz Yangz Denz gig nauhyied, ndigah de youq ndaw ranz laebguh le aen gihdi swnjcienz feihyiz Siuqdung, aen siengjmuengh ceiq hung de dwg aeu Siuqdung engq ndei swnjcienz roengzbae. “Aen gihdi son'gyauq dou neix mbouj hanh bi-ndwen, cijaeu maij Siuqdung, byawz cungj daeuj hag ndaej.” Yangz Denz naeuz, gij vunz daeuj hag Siuqdung haenx, boux iq miz daengz geij bi, boux hung miz daengz geijcib bi, geiz son'gyauq ndeu miz 50 daengz 80 boux vunz daeuj hag. Hoeng son'gyauq bouxswnjcienz Siuqdung hix bungzdaengz haujlai hojnanz. Haujlai bouxcoz cungj mbouj haengj hag faenh dinfwnz neix, hix miz mbangj vunz couhcinj miz yinx, hoeng naihsim mbouj doh, linghvaih cienz son'gyauq dwg aen vwndiz ceiq hung dangqnaj Yangz Denz bungzdaengz. “Siuqdung dwg gij vwnzva minzczu, itdingh mbouj ndaej saetcienz, ndigah couhcinj baenzlawz hojnanz gou hix aeu de swnjcienz roengzbae.” Yienznaeuz youq gwnz diuzroen swnjcienz Siuqdung lij miz haujlai hojnanz, hoeng Yangz Denz youq ndaw ranz laebguh le aen gihdi son'gyauq Siuqdung, lij fwngz gaem fwngz aeu gij dinfwnz Siuqdung son hawj engq lai vunz, de cingq yungh hengzdoengh bae saedyienh aen siengjmuengh swnjcienz Siuqdung.



▲Yangz Denz yiengq bouxyawj gaisau Siuqdung.